



UKA 2013/33
8. oktober 2913
Naaja H. Nathanielsen

Nunatsinni avatangiisinut aningaasaateqarfimmik pilersitsinissaq sulissutigeqqullugu kiisalu Inatsisartut aningaasanut inatsisaanni konto 24.11.23-mi naatsorsuutit, nukissioernemi ikummatissanut avatangiisit pillugit akitsuutikkut isertitat avatangiisinut aningaasaateqarfimmut atugassanngorlugit immikkoortinneqartalernissaat sulissutigeqqullugu Naalakkersuisut peqquneqarnissaannik Inatsisartut aalangiiffigisassaattut siunnersuut.
(Inatsisartunut ilaasortaq Kim Kielsen, Siumut)

Siunnersuuteqartoq Inuit Ataqatigiinnit isumaqatigaarput isumaqarmat Kalaallit Nunaanni avatangiisit pillugit suliniutit eqqarsaatigalugit annertuunik suli naammassiniagassaqartoq. Suliniutit ilaasa tungaasigut angusaqangaatsiarsimavugut, kisiannili tassa suliniuteqartoqarpoq amerlasuunik suli pimoorunneqarnerusariaqartunik. Atuinerulerujartorpugut, tamatumalu avatangiisit sunnertarpei. Imissarput, eqqagassaativut, immami avatangiisigut – sumulluunniit pigaluarutta angallavigut tamarmik sunnerneqartarput. Taamaasilluta siunnersuuteqartoq ilalerparput isumaqarmat avatangiisit sunnerneqartarnerat pillugu paasissutissiisarneq ilisimassuseqarnerlu qaffassarneqarnerusariaqartoq.

Kisianni siunnersuuteqartoq isumaqatiginngilarput isumaqarmat avatangiisinut aningaasaateqarfimmik nutaamik pilersitsinikkut tamanna aaqqinneqarsinnaasoq. Akitsuutinit tigusanik siunertanut aalajangersimasunut atugassanngorlugit immikkoortitsisoqartarnisaanik eqqarsarneq isumaqataaffiginngilarput. Siullermik aningaasat qassit aningaasaateqarfimmut ukiumut ikineqartassanersut qularnaatsumik oqaatigineqarsinnaanngilaq aappassaanilu Nunatta Karsiata aningaasaataanik Inatsisartut killilersorneqaratik tullerriaarisarnerat pisariunerulersinneqassaq. Aningaasat sulisullu aningaasaateqarfimmik ingerlatsinermut atorneqarnissaat aamma uggornarpoq – tassami aningaasat allaffissornermut atornagit allanut atorneqarsinnaagaluardata.

Inuit Ataqatigiit isumaqarpugut tamatumunnga taarsiullugu suliniutit pisariaqartinneqartut ataatsimut isigalugu nalilersorneqartariaqartut aammalu kommunitut tapiissutit ataatsimoortut isumaqatiginninniutigineqarnerannut aammalu akiitsunut aningaasaliisarnernullu periusissiamut atasutut tamanna isigineqartariaqartoq. Tamanna pillugu siunnersuut itigartitsissutigaarput, kisiannili ataatsimiititaliamut suliarisassanngorlugu inner-suussutigalutigu imatut oqaasertaqartumik allannguutissatut siunnersuumik ilallugu:

“Kingusinnerpaamik august 2014 nallertinnagu Inatsisartunut agguanneqartussamik oqaaseqaasioqqullugit Naalakkersuisut peqquneqarnissaannik Inatsisartut aalangiiffigisassaattut siunnersuut. Avatangiisinik aqutsinerput sukannernerulerseqqullugu oqaaseqaammi allaatigineqassapput avatangiisit pillugit suliniutit suut aningaasaliiffigineqarnisamat pisariaqartitsiffiunerpaanersut aammalu ukiuni aggersuni inatsisiliassatut suut pi-

lersaarutigineqarnersut. Oqaaseqaat 2015-imut aningaasanut inatsisissatut siunnersuummut atatillugu tulleriarinermut tunulequtsiisinnaasariaqarpoq.”